

摘藻堂四庫全書薈要

集部

欽定四庫全書薈要

集部

御選歷代詩餘卷四十八

九

詳校官編修臣汪鏞

欽定四庫全書薈要

御選歷代詩餘卷四十八目錄

起七十四字
至七十六字

河滿子

又一體

毛熙震

二首

晏幾道

二首

張先

蘓軾

杜安世

二首



孫洙

張草

沈士銑

前調又一體

毛滂

臨江仙 又一體

柳永 二首

別銀燈

杜安世

金錢子

劉基

碧牡丹

晏幾道

解蹀躞

周邦彥

楊无咎

方千里

吳文英

陳允平

訴衷情近

柳永 二首

前調 又一體

沈宗堦

前調 又一體

晁補之

碧牡丹

又一體

張先

晁補之

二首

風入松

又一體

吳文英

戈止

長生樂

晏殊

下水船

黃庭堅

賀鑄

前調

又一體

晁補之

蕊珠閒

又一體

趙彥端

越溪春

吳子孝

番槍子

韓玉

李獻能

剔銀燈

又一體

毛滂

御街行

晏幾道

二首

張先

柳永

晁補之

二首

王安中

辛棄疾

婆羅門引

曹組

蔡伸

辛棄疾

三首

吳文英

李晏

元好問

李俊民

張翥

荔支香

又一體

柳永

周邦彥

方千里

楊澤民

吳文英

二首

陳允平

于飛樂

又一體

毛滂

三首

離亭宴 又一體

張先

越溪春 又一體

歐陽修

下水船 又一體

晁補之

風入松 又一體

侯寘 二首

于國寶

吳文英

三首

蔣捷

周密

張炎

十二首

御選歷代詩餘卷四十八目錄

欽定四庫全書薈要卷二萬七百二十六

集部

御選歷代詩餘卷四十八

起七十四字
至七十六字

河滿子

又一體雙調

七十四字

河滿子

毛熙震

寂寞芳菲暗度歲華如箭堪驚緬想舊歡多少事轉添
春思難平曲檻絲垂金柳小牕絃斷銀箏深院空聞
燕語滿園閒落花輕一片相思休不得忍教長日愁生

誰見夕陽孤夢覺來無限傷情

前調

毛熙震

無語殘妝淡薄含羞顰袂輕盈幾度香閨眠過曉綺牕
疎日微明雲母帳中偷惜水晶枕上初驚笑靨嫩疑
花坼愁眉翠斂山橫相望只教添悵恨整鬟時見纖瓊
獨倚朱扉閒立誰知別有深情

前調

晏幾道

對鏡偷勻玉筍背人學寫銀鈎紅豆繫誰羅帶角心情

正著春遊那日楊花陌上多時杏子牆頭
眼底關山
無奈夢中雲雨空休問看幾許憐才意兩蛾藏盡離愁
難拚此回腸斷終須鎖定紅樓

前調

晏幾道

綠綺琴中心事齊紈扇上時光五陵年少渾薄倖輕如
曲水飄香夜夜魂銷夢峽年年淚盡啼湘歸雁行邊
遠字驚鸞舞處離腸蕙樓多少鉛華在從來錯倚紅妝
可羨鄰姬十五金釵早嫁王昌

前調

泛湖
夜歸

張先

溪女送花隨處沙鷗避樂分行遊舸已如圖障裏小屏
猶畫瀟湘人面新生酒豔日痕更欲春長衣上交枝
鬪色釵頭比翼相雙片段落霞明水底風紋時動妝光
宿從夜歸無月千燈萬火湖塘

前調

湖州
作

蘇軾

見說岷峨悽愴旋聞江漢澄清但覺秋來歸夢好西南
自有長城東府三人最少西山八國初平莫負花溪

縱賞何妨藥市微行試問當壚人在否空教是處聞名
唱著子淵新曲應須分外含情

前調

杜安世

細雨裛開紅杏新妝粉面鮮明東君何事教來早更無
綠葉同榮獨倚青樓吟賞目前無限輕盈薄命不依
闌檻高情或占郊垞清香繁豔真堪重枉教寂寞彫零
相次牡丹芍藥王孫誰道多情

前調

杜安世

柳嫩不禁搖動梅殘儘任飄零雨餘天氣來深院向陽
纖草重青寂寞小桃初綻兩三枝上紅英 又見雲中
歸雁嗁嗁斷續和鳴年年依舊無情緒鎮常冷落銀屏
不語閒尋往事微風頻動簾旌

前調

孫洙

悵望浮生急景淒涼寶瑟餘音楚客多情偏怨別碧山
遠水登臨目送連天衰草夜闌幾處疎砧 黃葉無風
自落秋雲不雨長陰天若有情天亦老搖搖幽恨難禁

惆悵舊歡如夢覺來無處追尋

前調

中秋

張草

月破秋寒灑背霜沾露影侵牀鐵笛幾聲今夜起記
來曲子霓裳孤杵響聽畫角吹笳人夢瀟湘 鉛水漱
如青淚江楓倩似紅妝啼鴈半行蘆荻老晶晶波下橫塘
往事思量一夜朝來直却迴腸

前調

沈士銑

斷雨殘雲意緒時時飛繞天涯纖指思將幽恨寫背人

擗碎琵琶憶昔樓中燕子十年坐擲風華暗水通流
曲徑秋千影弄平沙半榻桐花香換夕夢魂知落誰家
炙得一牕新碧日光重上溪紗

前調

又一體

毛滂

急雨初收珠點雲峯嶢絕天半轆轤金井卷甘冽簾外
翠陰遮徧波翻水精重簾秋在琉璃雙簾漏永流光
緩緩未放崦嵫晚晚紅荷綠艾暮天好小宴水亭風館
雲亂香噴寶鴨月冷釵橫玉燕

臨江仙

又一體雙調
七十四字

臨江仙

柳永

渡口向晚乘瘦馬陟崇岡西郊又送秋光對暮山橫翠
襯殘葉飄黃憑高念遠素景楚天無處不淒涼香閨
別來無信息雲愁雨恨難忘指鳳城歸路但烟水茫茫
凝情望斷淚眼盡日獨立斜陽

前調

柳永

上國去客停飛蓋促離筵長安古道縣縣見岸花啼露
對堤柳愁烟物情人意向此觸目無處不淒然 醉擁
征驂猶竚立盈盈淚眼相看況繡幃人靜更山館春寒
今宵怎向漏永頓成兩處孤眠

剔銀燈

雙調七十四字宋毛滂自製此調賦侑歌者以詞中
頻剔燈語名之但毛詞多一字此則後人所損也

剔銀燈

杜安世

昨夜一場風雨催促牡丹歸去孫武宮中石崇樓下多

情怎生為主真疑洛浦雲水算皆無重數
獨倚闌干凝佇香片亂沾塵土爭似當初不
曾相見免恁惱人腸
肚綠叢無語空留得寶刀剪處

金錢子

雙調七

十四字

金錢子

午日

劉基

雲淡風微江雨欲來還去倚闌干鬢霜千縷
白水青蕪是征鴻歸處望盡天涯夕陽猶在
深深樹
艾葉榴花

又上阿誰門戶悄空梁燕雛自語王謝亭臺杳不知何
許獨立蒼茫亂鴉啼滿城鐘鼓

碧牡丹

雙調七

十四字

碧牡丹

晏幾道

翠袖疎紈扇涼葉催歸鴈一夜西風幾處傷高懷遠細
菊枝頭開嫩香還徧月痕依舊庭院事何限悵望秋
意晚離人鬢華將換靜憶天涯路比此情還短試約鸞

賤傳素期良願南雲應有新雁

解蹀躞

本商調曲名後以名
詞雙調七十五字

解蹀躞

周邦彥

候館丹楓吹盡回旋隨風舞夜寒霜月飛來伴孤旅還
是獨擁秋衾夢餘酒困都醒滿懷離苦甚情緒深念
凌波微步幽房暗相遇淚珠都作秋宵枕前雨此恨音
驛難通待憑征鴈歸時帶將愁去

前調

楊无咎

迤邐韶華將半桃杏勻於染又還撩撥春心倍悽黯準
擬酩酊狂吟可憐無復當年酒腸文膽倦遊覽顛顛
羞窺鸞鑑眉端為誰斂可堪風雨無情暗亭檻觸目千
點飛紅問春爭得春愁也隨春減

前調

次周美成韻

方千里

院宇無人晴晝靜看簾波舞自憐春晚漂流尚羈旅那
況淚濕征衣恨添客鬢終日子規聲苦動離緒漫整

徘徊愁步何時再相遇
舊歡如昨匆匆楚臺雨別後南
北天涯夢魂猶記關山屢隨書去

前調

別情

吳文英

醉雲又兼醒雨楚夢時來往倦蜂剛著梨花惹游蕩還
做一段相思冷波葉舞愁見送人雙槳暗凝想情共
天涯秋黯朱橋鎖深巷會稀投得輕分頓惆悵此去幽
曲誰來可憐殘照西風半妝樓上

前調

次周美
成韻

陳允平

岸柳飄殘黃葉尚學纖腰舞謝他終日亭前伴羈旅無
奈歷歷寒蟬為誰喚老西風伴人吟苦悶無緒記得
芙蓉江上蕭娘舊相遇如今憔悴黃花慣風雨把酒東
望家山醉來一枕閒牕夢隨秋去

訴衷情近

雙調七

十五字

訴衷情近

柳永

雨晴氣爽佇立江樓望處澄明遠水生光重疊暮山聳

翠遙想斷橋幽徑隱隱漁村向晚孤烟起
殘陽裏脈脈朱闌靜倚黯然情緒未飲先如醉
愁無際暮雲過了秋風老盡故人千里竟日空凝睇

前調

柳永

幽閨晝永漸入清和氣候榆錢飄滿閒堦蓮葉嫩生翠
沼遙望水邊幽徑山掩孤村是處園林好閒情悄綺
陌游人漸少少年風韻自覺隨春老前遊香鳳城信阻
天涯目斷暮雲芳草佇立空殘照

前調

又一體江
行有感

沈宗堦

霞淡霜濃說是嚴冬正早迷離一望丹楓漸落江皋深
草伴我秋容寂寂野服踈踈漫道風光好孤颿悄數
盡長安春老而今細想爭似春年少金尊倒釵光蕭冷
雄心濩落斷篙撐盡風帶孤雲繞

前調

又一
體

晁補之

小園過午便覺涼生翠柏戎葵間出牆紅萱草靜依徑
綠還是去年浮瓜沉李追涼故遶池邊竹小筵促忽

憶楊梅正熟下山南畔畫舸笙歌逐愁凝目使君彩筆
佳人錦字斷絃怎續盡日闌干曲

碧牡丹

又一體雙調
七十五字

碧牡丹

張先

步障搖紅綺曉月墮沉烟砌緩板香檀唱徹伊家新袞
怨入眉頭斂黛峯橫翠芭蕉寒雨聲碎鏡華翳閒照
孤鸞戲思量去時容易鈿合瑤釵至今冷落輕棄望極

藍橋但暮雲千里幾重山幾重水

前調

王晉卿
宅觀舞

晁補之

院宇簾垂地銀箏雁低春水送出燈前婀娜腰肢柳細
步蹙香裯紅浪隨鴛履梁州緊鳳翹
竦輕體繡帶因風起霓裳恐非人世調促香檀困入流波生媚上客
休辭眼亂尊中翠玉階霜透羅袂

前調

晁補之

睡起情無著曉雨盡春寒弱酒盞飄零幾日頓疎行樂

試數花枝問此情何若為誰開為誰落 正愁却不是
花情薄花元笑人蕭索舊觀千紅至今冷夢難託燕來
春風更幾人驚覺對花羞為花惡

風入松

又一體雙調

七十五字

風入松

雲麓園
堂燕客

吳文英

一番疎雨洗芙蓉玉冷丁東轆轤聽帶秋聲轉早涼生
傍井疎桐歡宴良宵好月佳人修竹清風 臨池飛閣

乍青紅移酒小垂虹
貞元供奉梨園曲
稱十香深蘸
鍾醉夢孤雲曉色
笙歌一派秋空

前調

漫興

戈止

生涯應作浣花翁
事事疎慵結廬
恰喜塵囂外
栽花地
雨碧霜紅家在
亂雲深處
人來流水聲中
年年相識
舊東風排我小簾櫳
榆錢落盡
萍錢綠
奚囊在不畏詩
窮
夜泛試移短襪
曉眠常過高春

長生樂

雙調七

十五字

長生樂

晏殊

玉露金風月正圓
臺榭早涼天
畫堂嘉會組繡列芳筵
洞府星辰龜鶴來添福壽歡聲喜色同入金爐泛濃烟
清歌妙舞急管繁絃榴花滿酌觥船人盡祝富貴又
長年莫教紅日西晚留著醉神仙

下水船

雙調七

十五字

下水船

黃庭堅

總領神仙侶齊到青雲岐路丹禁風微咫尺諦聞天語
盡榮遇看即如龍變化一擲靈梭風雨真游處上苑
尋春去芳草芊芊迎步幾曲笙歌櫻桃宴裏歡聚瑤觴
舉回祝堯齡萬萬端的君恩難負

前調

賀鑄

芳草青門路還拂京塵東去回想當年離聲送君南浦
愁幾許尊酒留連薄暮簾卷津樓烟雨凭闌語草草

衡皋賦分首驚鴻不駐燈火虹橋難尋弄波微步漫凝
佇莫怨無情流水明日扁舟何處

前調

又一體
瓊花

晁補之

百紫千紅翠惟有瓊花特異便是當年唐昌觀中玉蕊
尚記得月裏仙人來賞明日喧傳都市 甚時又分與
揚州本一朵冰姿難比曾向無雙亭邊半酣獨倚似夢
覺曉出瑤臺十里猶憶飛瓊標致

蕊珠閒

又一體雙調
七十五字

蕊珠閒

趙彥端

浦雲融梅風斷碧水無情輕度有嬌鶯上林梢向春欲
舞綠烟迷晝淺寒欺暮不勝小樓凝佇倦遊處故人
相見易阻花事從今堪數片帆無恙好在一篙新雨醉
袍宮錦畫羅金縷莫教恨傳幽句

越溪春

雙調七十五字始於歐陽修詞中語
但歐詞七十六字此亦後人所損也

越溪春

探梅

吳子孝

碧宇雲寒風又峭閒探曲溪邊乍逢姑射神仙點雪偏
清片玉孤妍羅韞無塵水肌不粟臨水嫣然萬花誰
敢爭先獨占小春天暗聞香氣霏霏遙度中宵澹月籠
烟試問青青成子後調鼎是何年

番槍子

雙調七十五字一名春草碧本韓玉詞中語
得名或分二調以平仄稍異然實無別也

番槍子

韓玉

莫把團扇雙鸞隔要看玉溪頭春風客妙處風骨蕭閒
翠羅金縷瘦宜窄轉面兩眉攢青山色到此月想精
神花似秀質待與不清狂如何得奈何難駐朝雲易成
春夢恨又積送上七香車春草碧

前調

李獻能

紫簫吹破黃州月簌簌小梅花飄香雪寂寞花底風鬟
顏色如花命如葉十里浣兵塵凌波韞心事鑑影鸞
孤筇絃鴈絕舊時雪堂人今華髮斷腸金縷新聲杯深

不覺琉璃滑醉夢遶南雲花上蝶

別銀燈

又一體雙調七十五
字調名始於此詞

別銀燈

賦侑
歌者

毛滂

簾下風光自足春忽到席間屏曲
瑤甕酥融羽觴蟻鬪
花映鄴湖寒綠汨羅愁獨又何似紅圍翠簇
聚散悲
歡箭速不易一杯相屬頻別銀燈別聽牙板尚有龍膏
堪續羅熏繡馥錦瑟畔低迷醉玉

御街行

雙調七

十六字

御街行

晏幾道

年光正似花梢露彈指春還暮翠眉仙子望歸來倚徧
玉城珠樹豈知別後好風涼月往事無尋處狂情錯
向紅塵住忘了瑤臺路碧桃花蕊已應開欲伴彩雲飛
去回思十載朱絃青鬢枉被浮名誤

前調

晏幾道

街南綠樹春饒絮雪滿遊春路樹頭花豔雜嬌雲樹底
人家朱戶北樓閒上疎簾高卷直見街南樹 闌干倚
盡猶慵去幾度黃昏雨晚春盤馬踏青苔曾傍綠陰深
駐落花猶在香屏空掩人面知何處

前調

張先

畫船橫倚烟溪半春入吳山徧主人憑客且遲留程入
花溪遠遠數聲蘆葉兩行霓袖幾處成離宴 紛紛歸
騎亭皋晚風順檣烏轉古今惟別最銷魂因別有情須

怨高臺獨上不堪凝望目與飛雲斷

前調

柳永

燭柴烟斷星河曙寶輦回天步端門羽衛簇雕欄六樂
舜韶先舉鴈書飛下雞竿高聳恩澤均寰寓赤霜袍
爛飄香霧喜色成春煦九儀三事仰天顏八彩旋生眉
宇椿齡無盡蘿圖有慶常作乾坤主

前調

晁補之

年年不放春閒了今歲銜杯少來時柳上淺金黃歸路

玉繡吹帽惜春長似五陵狂俊不道朱顏老 斜烟薄
雨青林杳猶有鶯聲到西園紅豔綠盤龍辜負一年春
好錦城樂事不關愁眼何似還家早

前調

晁補之

天街月照珠簾粉鞦韆曾相近繁華樂事老來慵對酒
尚憐佳景王孫年少風流應更無奈春愁悶 幽期莫
悞香閨恨羅帶今朝褪月圓花好一般春觸處總堪乘
興有人惆悵何如歸好相見憑君問

前調

賜衣
襖子

王安中

清霜飛入蓬萊殿別進雲裘軟却回宸慮念多寒詔語
日邊親遣水蠶繅厚金鵬錦好永夜縫宮線紅旌絳
旆迎星傳喜氣歡聲遠廟堂勲舊使臺賢領袖坐中爭
絢天香馥郁君恩歲歲一醉春生面

前調

辛棄疾

山城甲子冥冥雨門外青泥路杜鵑只是等閒啼莫被
他催歸去垂楊不語行人去後也會風前絮情知夢

裏尋鵲鷺玉殿追班處怕君不飲太愁生不是苦留君
住白頭笑我年年送客自歎春江渡

婆羅門引

雙調七十六字婆羅門外國名唐楊敬述進婆羅門
曲後改爲霓裳羽衣唐樂志載婆羅門國舞宋隊舞
亦有此名遂以名詞調以曹組詞爲望月而
作又有加望月二字者本調名止四字也

婆羅門引

望月

曹組

漲雲暮卷漏聲不到小簾櫳銀河淡埽澄空皓月當軒
高桂秋入廣寒宮正金波不動桂影朦朧佳人未逢

歎此夕與誰同望遠傷懷對影霜滿秋紅南樓何處想
人在長笛一聲中凝淚眼立盡西風

前調

再游仙樟
薛氏園亭

蔡伸

素秋向晚歲華分付木芙蓉蕭蕭紅蓼西風記得當時
擷翠擁手遶芳叢念吹簫人去明月樓空遙山萬重
望寸碧想眉峯翠鈿瓊璫謾好誰適為容淒涼懷抱算
此際唯我與君同凝淚際目送征鴻

前調

別杜
叔高

辛棄疾

落花時節杜鵑聲裏送君歸未消文字湘纍只怕蛟龍
雲雨後會渺難期更何人念我老大傷悲已而已而
算此意只君知記取岐亭買酒雲洞題詩爭如不見纔
相見便有別離時千里月兩地相思

前調

用韻別
郭逢道

辛棄疾

綠陰啼鳥陽關未徹早催歸歌珠悽斷纍纍回首海山
何處千里共襟期歎高山流水絃斷堪悲中心悵而
似風雨落花知更擬停雲君去細和陶詩見君何日待

瓊林宴罷醉歸時人爭看寶馬來思

前調

趙晉臣數丈
張燈索賦

辛棄疾

落星萬點一天寶
燄下層霄人間疊作仙鰲最愛金蓮
側畔紅粉裛花梢
更鳴鼉擊鼓噴玉吹簫
曲江畫橋
記花月可憐宵
相見閒愁未了宿酒纔消
東風搖蕩似
楊柳十五女兒腰
人共柳那箇無聊

前調

吳文英

香霏泛酒瘴花初洗玉壺冰
西風乍入吳城吹徹玉笙

何處曾說董雙成
奈司空經慣未暢高情
瑤臺幾層
但夢遶曲欄行
空憶雙蟬疊翠
寂寂秋聲
堂空露冷
倩誰喚行雲來
洞庭團扇月只隔烟屏

前調

保德西樓作

李晏

汗融畏日豈知高處有風清
倚闌襟袖涼生坐看歸雲
脫壞不礙亂峯青
待目窮千里却怕傷情
河汾古城
聽裂岸怒濤驚
好是烽沉幽障鼓
卧邊亭西樓老子更
無用胸中十萬兵
酒到處莫放杯停

前調

望月

元好問

素蟾散彩九秋風露發清妍
嫦娥儘有情緣留著盈盈
三五永夜照凭肩看晚妝
臨鏡若箇嬋娟尋常月圓
恨都向舊時偏幾度郵亭
枕上茅店尊前珠明玉秀
算一日相看一日仙人共
月長似今年

前調

東湖
賞菊

李俊民

浮雲霽色江涵秋影雁初飛
相逢共繞東籬點檢尊前
見在人似曉星稀對滿山
紅樹葉葉堪題大家露頂

任短髮被風吹只恐黃花人貌不似年時杯添野水更
何用頻頻望白衣沉醉後攜手方歸

前調

七月望西湖觀水燈

張翥

暮天映碧玻璃千頃蕊珠宮金波擁出芙蓉誰喚川妃
微步一色夜妝紅看光搖星漢起舞魚龍月華正中
畫船漾藕花風聲度鸞簫縹緲雁柱玲瓏酒闌興極更
移上瓊樓十二重殘醉醒烟水連空

荔支香

又一體雙調

七十六字

荔支香

柳永

甚處尋芳賞翠歸來晚緩步羅幃生塵來遶瓊筵看金
縷霞衣輕褪似覺春游倦遙認衆裏盈盈好身段擬
回首又佇立簾幃畔素臉紅眉時揭盃頭微見笑整金
翹一點芳心在嬌眼王孫空恁腸斷

前調

周邦彥

照水殘紅零亂風喚去盡日側側輕寒簾底吹香霧黃

昏客枕無慘細響當牕雨閒看兩兩相依燕新乳樓
下水漸綠徧行舟浦暮往朝來心逐片帆輕舉何日迎
門小檻朱籠報鸚鵡共剪西牕蜜炬

前調

次周美
成韻

方千里

勝日登臨幽趣乘興去翠壁古木千章林影生寒霧空
濛冷濕人衣山路原無雨深澗斗瀉飛泉淘甘乳漁
唱晚看小櫂歸前浦笑指官橋風颭酒旗斜舉還脫宮
袍一醉芳杯倒鸚鵡幸有雕籠蠟炬

前調

次周美成韻

楊澤民

瞰水素多佳趣春未去繡桷陡起凌空隱隱籠輕霧已
飛盡棟朝雲又卷西山雨相與共煮新茶取花乳開
宴處倚北榭臨南浦迤邐扁舟雙槳權歌齊舉座上嘉
賓妙句無非賦鸚鵡莫惜高烧蠟炬

前調

送人游南徐

吳文英

錦帶吳鉤征思橫淮水夜吟敲落霜紅船傍楓橋繫相
思不管年華喚酒吳娃市因語駐車新堤步秋綺淮

楚尾暮雲送人千里細雨南樓香密錦溫曾醉花谷依
然秀靨偷春小桃李為語夢牕憔悴

前調七夕

吳文英

睡起時聞晚鵲噪庭樹又說今日天津西畔重歡遇蛛
絲暗鎖紅樓燕子穿簾處天上未比人間更情苦秋
鬢改妒月妙長眉嫵過雨西風數葉井梧愁舞夢入藍
橋幾點疎星映朱戶淚濕河邊凝佇

前調

次周美成韻

陳允平

杜宇聲聲頻喚春漸去暗碧柳色依依湖上迷青霧殘
香淨洗紅蘭昨夜朱鉛雨金泥帳底雙虬自沉乳天
際漸迤邐片帆南浦一笑薔薇別後酒杯慵舉江上琵琶
莫遣東風誤鸚鵡淚擁通宵蠟炬

于飛樂

又一體雙調

七十六字

于飛樂

和曹子方

毛滂

水邊山雲畔水新出烟林送秋來雙檜寒陰檜堂寒香

霧碧簾箔清深放衙隱几誰知共雲水無心望西園
飛蓋夜月到清尊為詩翁露冷風清褪紅裙去碧袖花
草爭春勸翁須飲莫辜負風月留人

前調

毛滂

記昔騰濃睡裏一片行雲未多時夢破雲驚聽轆轤聲
斷也井底銀餅不如羅帶等閒時結得同心繫畫船
楊柳岸曉月亭亭記陽關斷韻殘聲被西風吹玉枕酒
魄還清有些言語獨自箇說與誰應

前調

毛滂

並梅兄雙蝶子烟縷衫輕鳳凰釵繚繞香雲淡淡梳妝
得恁雪膩酥勻揉春捻就更是他花與精神黛尖低
桃萼破微笑輕顰早做成役夢勞魂好風外佳月下莫
忘行人扁舟去也沒箇事多樣離情

離亭宴

又一體雙調

六十七字

離亭宴

公擇別
吳興

張先

捧黃封詔卷隨處是離亭別宴紅翠成輪歌未徧已恨
野橋風便此去濟南非久惟有鳳池鸞殿三月花飛
幾片又減却芳菲過半千里恩深雲海淺民愛比春流
不斷更上玉樓西歸鴈與征帆共遠

越溪春

又一體雙調七十六
字調名始於此詞

越溪春

歐陽修

三月十三寒食日春色徧天涯越溪閨苑繁華地傍禁

垣珠翠烟霞紅粉牆頭秋千影裏臨水人家 歸來晚
駐香車銀箭透牕紗有時三點兩點雨霽朱門柳細風
斜沉麝不燒金鴨冷玲瓏月照梨花

下水船

又一體雙調
七十六字

下水船

廖明畧
妓田氏

晁補之

上客驪駒繫驚喚銀餅睡起因倚妝臺盈盈正解螺髻
鳳釵墜繚繞金盤玉指巫山一段雲委 半窺鏡向我

橫秋水斜領花枝交鏡裏淡拂鉛華匆匆自整羅綺斂
眉翠雖有惜惜密意空作江邊解珮

風入松

又一體雙調

七十六字

風入松

西湖

侯寘

少年心醉杜韋孌曾格外疎狂錦箋預約西湖上共幽
深竹院松牕愁夜黛眉顰翠惜歸羅帕分香重來一
覺夢黃梁空烟水微茫如今眼底無姚魏記舊游凝佇

淒涼入扇柳風殘酒點衣花雨斜陽

前調

侯寘

東樓烟重暗山光春意墮微茫小紅嫩綠勻如翦黯無
言雲渡澄江沒處與人消遣倚闌情寄斜陽共君今
夜舉清觴投老各殊方算來官事何時了恨花時潘鬢
先霜喚取客帆聊住將予同下瀟湘

前調

題酒
肆

于國寶

一春長費買花錢日日醉湖邊玉驄慣識西湖路驕嘶

過沽酒樓前紅杏香中歌舞綠楊影裏秋千暖風十
里麗人天花壓鬢雲偏畫船載得春歸去餘情付湖水
湖烟明日重扶殘醉來尋陌上花鈿

前調

春晚感懷

吳文英

聽風聽雨過清明愁草瘞花銘樓前綠暗分携路一絲
柳一寸柔情料峭春寒中酒交加曉夢啼鶯西園日
日埽林亭依舊賞新晴黃蜂頻撲秋千索有當時纖手
香凝惆悵雙鴛不到幽堦一夜苔生

前調

吳文英

蘭舟高蕩漲波涼。愁被矮橋妨。暮烟疎雨，西園路，誤秋
孃。淺約宮黃，還泊郵亭，喚酒舊曾送客斜陽。蟬聲空
曳別枝長。似曲不成商。御羅屏底，翻歌扇，憶西湖，臨水
開牕。和醉重尋幽夢，殘衾已斷熏香。

前調

鄰舟
妙香

吳文英

畫船簾密不藏香。飛作楚雲狂。傍懷半卷金爐，燼怕煖
消春日。朝陽清馥，晴熏殘醉，斷烟無限思量。凭闌心

事隔垂楊樓燕鎖幽妝梅花偏惱多情月慰溪橋流水
昏黃哀曲霜鴻悽斷夢魂寒蝶悠揚

前調

蔣捷

東風方到舊桃枝仙夢已雲迷畫闌紅子桴蒲處依然
是春晝簾垂恨殺河東獅子驚回海底鷗兒羣芳小
步莫嫌遲此去却慵移斷腸不在分襟後元來在襟未
分時柳岸猶携素手蘭房早掩朱扉

前調

立春

周密

柳梢烟暖已毵瓏嬌眼試東風晴絲又逐青絲亂刺寒
輕猶戀芳櫳笋玉新裁蚤燕杏鈿時引晴蜂當時蘭
柱繫花驄人在小樓東嬌鶯戲索迎春句愛露牋新染
香紅未信閒情更嬾探花拚醉瓊鍾

前調

賦稼村

張炎

老來學圃樂年華茅屋短籬遮兒孫戲逐田翁去小橋
橫路轉三叉細雨一犁春意西風萬寶生涯携筇猶
說渡晴沙流水帶寒鴉門前少得寬閒地遶平疇盡是

桑麻却笑牧童遙指杏花深處人家

前調

岫雲

張炎

卷舒無意入虛玄丘壑伴雲烟石根青氣千年潤覆孤
松深護啼猿靄靄靜隨仙隱悠悠閒對僧眠 傍花嬾
向小溪邊空谷覆流泉浮蹤自感今如此已無心萬里
行天記得看人歸去御風飛過斜川

前調

酒邊
偶賦

張炎

小牕晴碧颭簾波畫影舞飛梭惜春休問花多少柳成

陰春已無多金字初尋小扇銖衣早試輕羅
園林未肯受清和人醉牡丹坡嘯歌且盡平生事問東風畢竟
如何燕子尋常巷陌酒邊莫唱西河

前調

張炎

一春不是不尋春終是不忺人好懷漸向終年減對歌
鐘渾沒風情短唱怕黏飛絮輕衫厭撲游塵
煖香十里軟鶯聲小舫綠楊陰夢隨蝴蝶飄零後尚依依花月
關心惆悵一株梨雪明年甚處清明

前調

題澄江仙
刻海山圖

張炎

危樓古鏡影猶寒，倒影忽相看。
桃花不識東西晉，想如今也夢邯鄲。
縹緲神仙海上，飄零圖畫人間。
寶光丹氣共迴環，水弱小舟閒。
秋風難老三株樹，尚依依、脆管清彈。
說與霓裳莫舞，銀橋不到深山。

前調

聽琴中
彈樵歌

張炎

松風掩晝隱深清，流水自泠泠。
一從柯爛歸來，後愛絃聲不愛枰。
聲。聲。頗笑山中散木，翻憐爨下勞薪。
透雲遠

響正丁丁孤鳳劃然鳴疑行嶺上千秋雪語高寒相應
何人回首更無尋處一江風雨潮生

前調

為山村賦

張炎

晴嵐暖翠護烟霞喬木晉人家幽居只恐歸圖畫喚樵
青多種桑麻門掩推敲古意泉分冷淡生涯無邊風
月樂年華留客可茶瓜任他車馬雖嫌僻笑喧喧流水
寒鴉小隱正宜深靜休栽湖上梅花

前調

題蔣氏溪山堂

張炎

門前山可久長看留住白雲難溪虛却與雲相傍對白
雲何必深山爽氣潛生樹石曉光竟入闌干舊家三
徑竹千竿蒼雪拂衣寒綠蓑青笠元真子釣風波不是
真閒得似壺中日月依然只在人間

前調

閏元
宵

張炎

向人圓月轉分明簫鼓又逢迎風吹不老蛾兒鬧繞玉
梅猶戀香心報道依然放夜何妨款曲行春錦燈重
見麗繁星水影動梨雲今朝準擬花前醉奈今宵別是

金夕口五
卷四十八
光陰簾底聽人笑語莫教遲了梅青

前調

與王彥常
游會仙亭

張炎

愛閒能有幾人來松下獨徘徊清虛冷淡神仙事笑名
場多少塵埃漱齒石邊危坐洗心亭裏舒懷 劃然長
嘯白雲堆更待月明陪一瓢春水山中飲喜無人踏破
蒼苔開了桃花半樹此游不是天台

前調

酌惠
山泉

張炎

一瓢飲水曲肱眠此樂不知年今朝忽上龍峯頂却元

來有此甘泉洗却平生塵土慵游萬里山川照人如
鏡止如淵古竇暗涓涓當時桑苧今何在想松風吹斷
茶烟著我白雲堆裏安知不是神仙

前調

溪山
堂竹

張炎

新篁依約珮初搖老石潤山腰逸人未必猶酣酒正溪
頭風雨蕭蕭礪齒猶隨市隱虛心肯受春招從教三
徑入漁樵對此覺塵消娟枝冷葉無多子伴明牕書卷
詩瓢清過炎天梅蕊淡欺雪裏芭蕉

御選歷代詩餘卷四十八

欽定四庫全書薈要

御選歷代詩餘卷四十九目錄

起七十六字
至七十八字

風入松 又一體

利登

虞集

張翥 二首

吳子孝

文徵明 五首

陸深

沈縻

祝英臺近

又一體

蘇軾

呂渭老

趙長卿

辛棄疾

程垓

趙彥端

岳珂

劉過

二首

張輯

二首

黃機

高觀國

二首

史達祖

三首

韓淲

二首

張渠

吳文英

四首

蔣捷

周密

二首

張炎

六首

湯恢

二首

李彭老

無名氏

三首

吳淑姬

邵亨貞

側犯

周邦彥

袁去華

姜夔

方千里

楊澤民

陳允平

四園竹

周邦彥

方千里

楊澤民

御街行

又一體

張先

劉基

撲蝴蝶近 又一體

呂渭老

無名氏

快活年近拍

万俟雅言

一叢花

歐陽修

蘇軾

秦觀

晁補之

二首

趙長卿

二首

程垓

袁去華

陸游

韓洄

吳子孝

鳳樓春

歐陽炯

陽關引

寇準

晁補之

金人捧露盤

辛棄疾

二首

甘州令

柳永

紅牕燈影

王錫爵

御街行

又一體

范仲淹

楊无咎

辛棄疾

程垓

李清照

御選歷代詩餘卷四十九目錄

欽定四庫全書薈要卷二萬七百二十七

集部

御選歷代詩餘卷四十九

起七十六字
至七十八字

風入松

又一體雙調

七十六字

風入松

利登

斷蕪幽樹際煙平山外更山青天南海北知何極年年
是匹馬孤征看盡好花結子暗驚新笋成林歲華情
事苦相尋弱雪鬢毛侵十千斗酒悠悠醉斜河界白月

雲心孤鶴盡邊天
濶清猿啼處山深

前調

虞集

畫堂紅袖倚清酣
華髮不勝簪
幾回晚直金鑾殿
東風軟花裏停驂
書詔許傳宮燭
輕羅初試朝衫
御溝冰泮水
接藍飛燕
語呢喃
重重簾幙寒猶在
憑誰寄銀字
泥緘報道先生歸也
杏花春雨江南

前調

張翥

東風卷陌暮寒驕
燈火鬧河橋
勝遊偏憶錢塘夜
青鸞

遠信斷難招，蕙草情隨雪盡。梨花夢與雲消，客懷先
自痛無聊。綠酒負金蕉，下幃獨擁香篝。睡春城外玉漏
聲遙，可惜滿街明月，更無人為吹簫。

前調

清明日海
子上即事

張翥

尋春春在鳳城東，羅帕玉花驄。美人半蹙，垂鞭袖遊塵
遠目斷雲空，淺碧湖波雪漲，淡黃官柳煙蒙。相如多
病賦難工，宿酒更頻中。歸來自按新聲譜，憑誰解唱與
東風。一夜小牕疎雨，杏花明日應紅。

前調

春日直省次
虞伯生韻

吳子孝

漏聲驚夢不成酣和月整朝簪萬年枝上流鶯轉青霄
近笙度鸞驂仙掌香承曉露宮花紅映春衫 龍池柳
色碧於藍金屋燕呢喃綺牕無事東風靜芭蕉綠有恨
誰緘翻憶少年今日銀鞍芳草城南

前調

賞蓮

文徵明

虛堂殘暑已無多急雨戰秋荷雨晴瞥見芙蓉秀新妝
靚錦鞵凌波出水天然婀娜含風更自婆娑 花前有

客鼓雲和倚笛更長歌酒醒忽動江湖興陶然處如在
煙蘿一片瀟湘晚景相看玉女銀河

前調

秋葵

文徵明

秋來幽豔試宮妝蚤染薄羅裳翠翹斜映鵝兒淡比鵝
兒却自芬芳舊恨檀心暈紫新嬌粉額塗黃湘袍新
翦蒹葭長露浥冷天香晚涼自是無聊賴低垂首默默
傾陽剛被西風歛却含情自倚東牆

前調

夏夜
露坐

文徵明

空庭人散語音稀，獨坐漏遲遲。
風撩團扇無聊賴，桐陰亂露下沾衣。
斗轉銀河東瀉月，斜烏鵲南飛。
無端心事，集雙眉，睡思轉迷離。
牆西突兀高樓靜，流螢度疑是星移。
何處一聲長笛，等閒喚起相思。

前調

簡湯子重

文徵明

西齋睡起雨濛濛，雙燕語簾櫳。
平生行樂都成夢，難忘處碧鳳坊中。
酒散風生，棋局詩成，月在梧桐。
近來多病不相逢，高興若為同。
清尊白苧交新夏，應辜負綠樹。

陰濃憑仗柴門莫掩興來擬扣牆東

前調

文徵明

日長無事掩精廬繞屋樹扶疎南牕雨過湘簾捲煙霏
帳冰簟平鋪午困全消茗椀宿醒自倒冰壺虛堂風
定一塵無香裊博山鑪何時去覓山公笑花間醉樹底
撈蒲見說香生丹桂莫教秋近庭梧

前調

陸深

離筵高興付餘酣暫得解朝簪路出齊封三宿晝何須

便快著征驂兩岸山橫畫幃一川水膩羅衫終朝不
采滿筐藍話別語喃喃一把相思無處著欲憑寄鴈足
雙緘自是煙霄有待怕飛不到江南

前調

秋夜籟閣
聽雨感懷

沈麝

紫崖奔處斷雲行竹篠戰風鳴北郊黃葉埋荒徑苔痕
滑鶴唳淒清細聽虛飄天籟詩腸瀟灑羣生疎疎滴
滴數殘更做弄許多聲倦依孤枕愁常掩燈花約濕夢
分明此夜寒江淚落醉邊心事傷情

祝英臺近

又一體雙調

七十七字

祝英臺近

蘇軾

挂輕帆飛急槳還過釣臺路酒病無聊敲枕聽鳴櫓斷
腸簇簇雲山重重煙樹回首望孤城何處 間離阻誰
念縈損襄王何曾夢雲雨舊恨前歡心事兩無據要知
欲見無由癡心猶自倩人道一聲傳語

前調

呂渭老

寶蟾明朱閣靜新燕近簾語還記元宵燈火小橋路逢
迎春筍柔微凌波纖穩悄不顧斗斜三鼓甚無據誰
信一霎春愁鶯聲留不住柳色苔痕風雨暗花圃細看
羅帶銀鈎綃巾香淚算不枉那時分付

前調

趙長卿

記臨歧銷黯處離恨慘歌舞恰是江梅開徧小春暮斷
腸一曲金衣兩行玉筯酒闌後欲行難去惡情緒因
念錦幄香奩別來負情素冷落深閨知解怨人否料應

寶瑟慵彈露華嬾傳對鸞鏡終朝凝竚

前調

辛棄疾

寶釵分桃葉渡煙柳暗南浦怕上層樓十日九風雨斷
腸點點飛紅都無人管更誰勸流鶯聲住鬢邊覩試
把花卜歸期才簪又重數羅帳燈昏哽咽夢中語是他
春帶愁來春歸何處却不解帶將愁去

前調

程垓

墜紅輕濃綠潤深院又春晚睡起厭厭無語小妝嬾可

堪三月風光五更魂夢又都被杜鵑催儻
怎消遣人
道愁與春歸春歸愁未斷閒倚銀屏羞怕淚痕滿斷腸
沉水重熏瑤琴閒理奈依舊夜寒人遠

前調

趙彥端

獸金寒簾玉潤梅雪印苔絮春意如人易散苦難聚幾
多絲竹深情池塘幽夢猶倚賴與春同住 舊游處誰
喚別浦仙帆風前問征路煙雨連江吹恨正無數莫教
紫燕歸來彩雲開後空悵望主人輕去

前調

北固亭

岳珂

淡煙橫層霧斂勝槩分雄占月下鳴榔風急怒濤颭關
河無限清愁不堪臨鑑正雙鬢秋風塵染謾登覽極
目萬里沙場事業頻看劔古往今來南北限天塹倚樓
休弄新聲重城門掩歷歷數西州更點

前調

同妓遊帥司東園

劉過

窄輕衫聯寶轡花裏控金勒有底風光都在畫闌側日
遲春暖融融杏紅深處為花醉一鞭春色對嬌質為

我歌捧瑤觴歡聲動阡陌何似多情飛上鬢雲碧晚來
約住青驄踏花歸去亂紅碎一庭風月

前調

劉過

笑天涯還倦客欲起病無力風雨春歸一日近一日看
人結束春衫前呵騎馬腰劔上隴西平策鬢粉白只
可歸去家山無田種瓜得空抱遺書顛顚小樓側杜鵑
不管人愁月明枝上直啼到枕邊相覓

前調

張輯

竹間棊池上字風日共清美誰送春深湘綠漲沙嘴更
添揚抑無情恨煙顰雨却不把扁舟偷繫去千里明
日知幾重山後期幾重水對酒相思爭似且留醉奈何
琴劍匆匆而今心事在月夜杜鵑聲裏

前調

朱使君錢塘舟中

張輯

客西湖聽夜雨更向別離處小小船牕香雪照尊俎斷
腸一曲秋風行雲不語總寫入征鴻無數認眉嫵喚
醒岩壑風流丹砂有奇趣羞殺秦郎淮海謾千古要看

自作新詞雙鸞飛舞趁月底重修簫譜

前調

黃機

試單衣扶短策沙路淨如洗乍雨還晴花柳自多麗爭
知話別南樓片帆天際便孤了同心連理鎮縈繫謾
有羅帶香囊殷紅鬪輕翠一紙濃愁無處倩雙鯉可堪
飛夢悠悠春風無賴時吹過亂鶯聲裏

前調

荷花

高觀國

擁紅妝翻翠蓋花影暗南浦波面澹霞蘭艇採香去有

人水濺紅裙相招晚醉正月上涼生風露兩凝竚別
後歌斷雲閒嬌姿黯無語魂夢西風端的此苦遙想
芳臉輕顰凌波微步鎮輸與沙邊鷗鷺

前調

高觀國

一牕閒孤燼冷獨自箇春睡繡被熏香不似舊風味靜
聽滴滴檐聲驚愁攪夢更不管庾郎心碎念芳意一
併十日春寒梅花煞憔悴嬾做新詞春在可憐裏幾時
挑菜踏青雲沉雨斷盡分付楚天之外

前調

史達祖

柳枝愁桃葉恨前事怕重記紅藥開時新夢又溱洧此
情老去須休春風多事便老去越難迴避阻幽會應
念偷翦酴醾柔條暗縈繫節物移人春草更憔悴可堪
竹院題詩蘚苔聽雨寸心外安愁無地

前調

薔薇

史達祖

綰流蘇垂錦綬煙外紅塵逗莫倚莓牆花氣釀如酒便
愁醺醉青蚪蠕蠕無力戲穿碎一屏新繡漫懷舊如

今姚魏俱無風標較消瘦露點瑤香前度翦花手見郎
和笑拖裙匆匆欲去鶯忽地畱留芳袖

前調

史達祖

落花深芳草暗春到斷腸處金勒驕風欲過大堤去翠
樓葛嶺西邊恰如曾約畫闌映一枝瓊樹正凝佇芳
意欺月矜春渾欲便偷許多少鶯聲不敢寄愁與謝郎
日日西湖如今歸後幾時見倚簾吹絮

前調

韓 流

海棠開春色半桃李又如許一朵梨花院落闌干雨不
禁中酒情懷愛閒懊惱都忘却舊題詩處燕鶯語溪
岸點點飛絲楊柳無重數帶得愁來只恁空休去斷腸
芳草天涯行雲荏苒和好夢有誰分付

前調

韓 流

館娃宮采香徑范蠡五湖側子夜吳歌聲緩不須拍崇
桃積李花間芳洲綠偏更冉冉柳絮無力試思憶老
去一片身心辜負好春色古往今來時序惱行客去年

今日山中如何知得却又在他鄉寒食

前調

賦壯
母

張榘

柳絲稀桃錦淡春事在何許一種穠華天香漬冰露嫩
苞疊疊湘羅紅嬌紫妒翠葆護西真仙侶試聽取更
饒十日看承霞腴污塵土池館輕寒次第少風雨好趁
油幕清閒重開芳醕莫孤負鶯歌蝶舞

前調

上元

吳文英

晚雲開朝雪霽時節又燈市夜約遺香南陌少年事笙

簫一片紅雲飛來海上繡簾卷細挑春起舊遊地素
娥城闕年年新妝趁羅綺玉練冰輪無塵浣流水曉霞
紅處啼鴉良宵一夢畫堂正日長人睡

前調

除夜
立春

吳文英

翦紅情裁綠意花信上釵股殘日東風不放歲華去有
人添燭西牕不眠侵曉笑聲轉新年鶯語舊尊俎玉
纖曾擘黃柏朶香繫幽素歸夢湖邊還迷鏡中語可憐
千點吳霜寒銷不盡又相對落梅如雨

前調

餞陳少逸
被撥行部

吳文英

問流花尋夢草雲暖翠微路錦鴈峰前淺約書行處不
教嘶馬飛春一匝越鏡那銷盡紅吟綠賦送人去長
絲初染柔黃晴和曉煙舞心事偷占鶯漏漢宮語趁得
羅蓋天香歸來時候共留取玉闌春住

前調

春日遊龜
溪廢園

吳文英

採幽香尋古苑竹冷翠微路鬪草溪根沙印小蓮步自
憐兩鬢清霜一年寒食又身在雲山深處盡閒度因

甚天也慳春輕陰便成雨綠暗長亭歸夢趁風絮有情
花影闌干鶯聲門徑解留我霎時凝竚

前調

蔣捷

柳邊樓花下館低捲繡簾半簾外天絲擾擾似情亂知
他蛾綠纖眉鵝黃小袖在何處閒游閒玩最堪歎
面一寸塵深玉柱網斜鴈譜字紅鸞翦燭記同看幾回
傳語東風將愁吹去怎奈向東風不管

前調

園攬秀

周密

步玲瓏尋窈窕瑤草四時碧小小蓬萊花氣透簾隙幾
回翠水荷初蒼厓梅小綺寮掩玉壺春色柳屏窄芳
檻日日東風幾陣吹吟筆曲折花房鶯燕似曾識最憐
燈影纔收歌塵初靜畫樓外一聲橫笛

前調

後溪

周密

帶餘醒尋舊雨愁與病相半綠意陰陰絲竹靜深院絕
憐事逐春移淚隨花落似翦斷鮫房珠串書重見為
誰倦酒慵詩貧屏掩雙扇白髮潘郎羞見看花伴可堪

好夢殘時新愁生處煙月冷子規聲斷

前調

與友
話舊

張炎

水痕深花信足寂寞漢南樹轉首清陰芳事頓如許不
知多少銷魂夜來風雨猶夢到斷紅流處
寂無據長
年息影空山愁入庾郎句玉老田荒心事已遲暮幾回
聽得啼鴉不如歸去終不似舊時鸚鵡

前調

耕雲

張炎

占寬閒鉏浩渺船樣水村悄非霧非煙生氣覆瑤草蒙

算數畝春陰夢魂落寞知踏碎梨花多少
聽孤嘯山
淺種玉人歸縹緲度晴峭鶴下芝田五色散微照笑他
隔浦誰家半江疎雨空吟斷一犁清曉

前調

重過西湖
書所見

張炎

水西船山北酒多為買春去事與雲消飛過舊時雨漫
留一掬相思待題紅葉奈紅葉更無題處
正延佇亂
花渾不知名嬌小未成語短擢輕裝逢迎斷橋路那知
楊柳風流樹猶如此更休道少年張緒

前調

張炎

及春遊卜夜飲人醉萬花醒轉眼年華白髮半垂領與
鷗同一清波風蘋月樹又何似浮蹤不定靜中省便
須門掩柴桑黃卷作孤隱一粟生涯樂事在瓢飲愛閒
休說山深有梅花處更添個暗香疎影

前調

寄陳直卿

張炎

路重尋門半掩苔老舊時樹采藥雲深童子更無語怪
我流水迢迢湖天日暮想只在蘆花多處漫延竚姓

名題上芭蕉涼夜未風雨賦了秋聲還賦斷腸句幾回
獨立長橋扁舟欲喚待招取白鷗歸去

前調

題陸壺天
水墨蘭石

張炎

帶飄飄衣楚楚空谷飲甘露一轉花風蕭艾遽如許細
看息影雲根淡然詩思曾否被生香輕誤此中趣能
消幾筆幽竒羞掩衆芳譜辟老苔荒山鬼竟無語夢遊
忘了江南故人何處聽一片瀟湘夜雨

前調

湯恢

宿醒蘇春夢醒沉水冷金鴨落盡桃花無人埽紅雪漸
催煮酒園林單衣庭院春又到斷腸時節恨離別長
憶人立茶蘼珠簾卷幽月幾度黃昏瓊枝為誰折都將
千里芳心十年幽夢分付與一聲啼鴂

前調

湯恢

月如水天似水冷浸畫闌濕桂樹風前濃香半狼籍此
翁對此良宵別無可恨恨只恨故人頭白洞庭窄誰
道臨水樓臺清光最先得萬里乾坤元無片雲隔不妨

彩筆雲箋翠尊冰醞自管領一庭秋色

前調

後溪次周
草牕韻

李彭老

杏花初梅花過時節又春半簾影飛梭輕陰小庭院舊
時月底秋千吟香醉玉曾細聽歌珠一串忍重見描
金小字題情生綃合歡扇老了劉郎天遠玉簫伴幾番
驚外斜陽闌干倚徧恨楊花遮愁不斷

前調

無名氏

倚危闌斜日暮鶯鶯甚情緒穉柳嬌黃全未禁風雨春

江萬里雲濤扁舟飛渡那更聽塞鴻無數
歎離阻有恨流落天涯誰念泣孤旅滿目風塵冉冉如飛霧是何
人惹愁來那人何處怎知道愁來不去

前調

憶別

無名氏

海棠開花影下憶得舊遊戲恰似駢鸞同在彩雲裏夢
回雨散雲收匆匆歸去一枕乍驚殘春睡甚情味人
去花也飄零餘香半憔悴點點飛紅都是去時淚可堪
冷落黃昏瀟瀟微雨斷魂處朱闌獨倚

前調

無名氏

翦酴醾移芍藥深院教鸚鵡消遣宿醒敲枕熏沉炷自
從載酒西湖探梅南浦久不見雪兒歌舞恨無據因
甚不展眉頭凝愁過百五雙燕無情難寄斷腸句可憐
淚濕青綃怨題紅葉落花亂一簾風雨

前調

宋媛

吳淑姬

粉痕消芳信斷好夢總無據病酒無聊敲枕聽殘雨斷
腸曲曲屏山溫溫沉水都是舊看承人處久離阻應

念一點芳心閒愁知幾許偷照菱花清瘦自羞覩可堪
梅子酸時楊花飛絮亂鶯又催將春去

前調

邵亨貞

普天雲深夜雨幽興到何許風拍疎簾燈影逗牕戶自
從暝宿河橋露聽江笛久不記舊遊湘楚正無緒可
奈滿目清商蕭蕭五陵樹斜掩屏山腸斷庾郎賦幾回
思繞蘋花夢尋蘭棹怕驚起故溪鷗鷺

側犯

雙調七十七字犯字是按歌時假借別調作腔詞原入
歌譜故宣政詞家有側犯尾犯花犯玲瓏四犯等名也

側犯

周邦彥

暮霞霽雨小蓮出水紅妝靚風定看步韞江妃照明鏡
飛螢度暗草秉燭遊花徑人靜攜豔質追涼就槐影
金環皓腕雪藕清泉瑩誰念省滿身香猶是舊荀令見
說吳姬酒壚深迴煙鎖漠漠藻池苔井

前調

袁去華

篆銷餘馥燭堆殘蠟房櫳曉寒峭看杏臉羞紅尚嬌小

游蜂靜院落綠水搖池沼間遶翠樹底喧聒啼鳥
愁風怕雨彈指春光了音信杳最堪恨歸鴈過多少困
倚孤眠晝長人悄睡起依然半牕殘照

前調

詠芍藥

姜夔

恨春易去甚春却向揚州住微雨正繭栗梢頭弄詩句
紅橋二十四總是行雲處無語漸半脫宮衣笑相顧
金壺細葉千朵圍歌舞誰念我鬢成絲來此共尊俎後
日西園綠陰無數寂寞劉郎自修花譜

前調

次周美成韻

方千里

四山翠合一溪碧繞秋容靚波定見鷺立魚跳動平鏡
修竹散步屨古木通幽徑風靜煙霧直池塘倒晴影
流年舊事老矣塵心瑩還暗省點吳霜顚顚媿潘令夢
憶江南小園路迴愁聽葉落轆轤金井

前調

次周美成韻

楊澤民

九衢豔質看來怎比他閒靚清韻似照水橫斜暮臨鏡
林間鎖畫閣花底藏芳徑幽靜將絳燭高燒照雙影

瓊瑤皓素未及肌膚瑩伊試省我從今還肯再孤令記
取蘭房夜深人迴牕外月照一方天井

前調

次周美成韻

陳允平

晚涼倦浴素妝薄試鉛華靚凝定似一朵芙蓉泛清鏡
輕紈笑自撚撲蝶鴛鴦徑閒靜金鳳彈斜敲翠蟬影
冰肌玉骨襯體紅綃瑩還暗省記青青雙鬢舊潘令夢
想鸞箏後堂深迴何日西風碧梧金井

四園竹

四或作西本曲名
也雙調七十七字

四園竹

周邦彥

浮雲護月未放滿朱扉鼠搖暗壁螢度破牕偷入書幃
秋意濃閒竚立庭柯影裏好風襟袖先知夜何其江
南路繞重山心知漫與前期奈向燈前墮淚腸斷蕭娘
舊日書辭猶在紙鴈信絕清宵夢又稀

前調

次周美
成韻

方千里

花驄縱策制淚掩斜扉玉鑪細裊鴛被半閒蕭瑟羅幃

銀漏聲那更雜疎疎雨裏此時懷抱誰知恨淒其西
牕自翦寒花沉吟暗數歸期最愛深情密意無限當年
往復書辭千萬紙甚近日人來字漸稀

前調

次周美成韻

楊澤民

殘霞殿雨皞氣入牕扉井梧墮葉寒砌叫蛩秋滿屏幃
羅袖匆匆敘別淒涼客裏異鄉誰更相知念伊其當
時芍藥同心誰知又爽佳期直待金風到後秋葉紅時
細寫情辭何用紙又却恐秋涼葉漸稀

御街行

又一體雙調

七十七字

御街行

張先

天非花豔輕非霧來夜半天明去來如春夢不多時去
似朝雲何處遠雞栖燕落星沉月統統城頭鼓參差
漸辨西池樹珠閣斜開戶綠苔深徑少人行苔上履痕
無數餘香遺粉剩衾閒枕天把多情付

前調

劉基

梧桐滴露鳴金井夜耿耿如年永月明棲鳥數移柯有
似佳期不定華年迅速碧霄迢遞別恨空心領青鸞
怕見單棲影任掩盤龍鏡盈盈一水隔雙星腸斷羽
迷鱗暝消愁憑酒祗應無奈酒與愁同醒

撲蝴蝶近

又一體雙調

七十七字

撲蝴蝶近

呂渭老

分釵綰髻洞府難分手離觴短闋啼痕永舞袖馬嘶霜

滑橋迴路轉人依古柳曉色漸分星斗
怎分割心兒一似傾入離愁萬千斗
垂鞭佇立傷心還病酒十年夢裏
嬋娟二月花中豆蔻春風為誰依舊

前調

無名氏

煙條雨葉綠徧江南岸思歸倦客尋芳來較晚
岫遙紅日初斜陌上花飛正滿淒涼數聲羌管
怨春短玉人應
在明月樓中畫眉嬾
戀箋錦字多時魚鴈斷恨隨去
水東流事與行雲共遠羅衾舊香猶暖

快活年近拍

雙調七

十七字

快活年近拍

万俟雅言

千秋萬歲君五帝三王世觀風重令節與民樂盛際蕊
宮長春洞天不老花豔蟾輝十里照春珠翠 闌羅綺
遙望太極一簇通明裏鈞臺奏壽蓬山呈妙戲六宮人
來五雲樓迴風送歌聲依約睿思新製

一叢花

雙調七

十八字

一叢花

歐陽修

傷春懷遠幾時窮
無物似情濃
離愁正恁牽絲亂
更南陌飛絮濛濛
歸期漸遙
征塵不斷
何處認郎蹤
雙鴛池沼水溶溶
南北小橋通
梯橫畫閣黃昏後
又還是新月簾櫳
沈恨細思不如桃李還鮮
嫁春風

前調

蘇軾

今年春淺臘侵年
冰雪破春妍
東風有信無人見
露微

意柳際花邊寒夜縱長孤衾易暖鐘鼓漸清圓
朝來初日半含山樓閣淡疎煙遊人便作尋芳計
小桃杏應已爭先酒病少情疎慵自放惟愛日高眠

前調

秦觀

年時今夜見師師雙頰酒紅滋疎簾半捲微燈外
露華上煙裊涼颼簪髻亂拋偎人不起彈淚唱新詞
佳期誰料久參差愁緒暗縈絲想應妙舞清歌罷
又還對秋色嗟咨惟有畫樓當時明月兩處照相思

前調

宗室令
郊送酒

晁補之

王孫睂宇鳳皇雛。天與世情疎。揚州座上瓊花底，佩錦囊、曾憶奚奴。金盞醉揮，滿身花影，紅袖競來扶。十年一夢訪林居。離袂重踟躕。應憐肺病臨邛客，寄洞庭、春色雙壺。天氣未佳，梅花正好，曾醉燕堂無。

前調

生日答
十二叔

晁補之

碧山無意鮮銀魚。花底且攜壺。華顛又喜熊羆旦，笑驢驥、老反為駒。文史漸拋，功名更嬾，隨處見真如。高情

敢竝漢庭疏長揖去田廬囊無上賜金堪散也未妨山
獵溪漁廉頗縱強莫隨年少白馬向黃榆

前調

暮春
送別

趙長卿

堦前春草亂抽芽塵暗綠牕紗釵盟鏡約知何限最斷
腸湓浦琵琶南渚送船西城折柳遺恨在天涯夜來
魂夢到儂家一笑臉如霞鶯啼燕恨西牕下問何事潘
鬢先華鍾動五更魂歸千里殘角怨梅花

前調

杏花

趙長卿

柳鶯啼曉夢初驚香霧入簾清
臙脂淡注宮妝雅似文
君猶帶春醒芳心婉婉媚容綽約桃李總消聲
相如
春思正營營無奈惜花情
曲闌小檻幽深處與殷勤遮
護娉婷姚黃魏紫十分顏色終不似輕盈

前調

程垓

傷心時候一凭闌何況別離難
東風只解催人去也不
道鶯老花殘青牋未約紅綃
忍淚無計鎖征鞍寶釵
瑤鈿一時間此恨苦天慳
如今直恁拋人去也不念人

瘦衣寬歸來忍見重樓淡月依舊五更寒

前調

袁去華

東風吹恨著睂心金約瘦難任西牕翦燭渾如夢最愁
處南陌分襟香歇繡囊塵生羅幃憔悴到如今 小花
幽院夜沉沉涼月轉槐陰拂牆樹動開朱戶又贏得愁
與更深青翼不來征鴻難倩流怨入瑤琴

前調

陸游

尊前凝竚漫淒迷猶恨負幽期從來不慣傷春淚為伊

後滴滿羅衣那堪更是吹簫池館青子綠陰時 回廊
簾影盡參差偏共睡相宜朝雲夢斷知何處倩雙燕說
與相思從今判了十分憔悴圖要箇人知

前調

韓流

翻空雪浪送飛花春曉媚霜華風迴點點迷人處峭寒
輕詩思殊佳雙燕未來斷鴻何在微雨又天涯 綺牕
明暗是誰家雕檻馥蘭芽畫檐簾捲黃昏後試傾杯笑
語喧譁聚散人生吾儕老矣醉墨任橫斜

前調

夏夜宿小蓮
萊對月不寐

吳子孝

玻璃牕影薄於冰
月色滿空庭
夜闌別館無人到
吹繡幙揚柳風清
幽興難窮徘徊竹徑
草上露華凝
閒揮玉麈練衫輕
坐久覺涼生
只疑瀟灑非塵境
洞門外雪墜盈盈
搗藥宮前游仙枕
上寒逼夢難成

鳳樓春

雙調七

十八字

鳳樓春

歐陽炯

鳳髻綠雲叢深掩房櫳錦書通夢中相見覺來慵勻面
淚臉珠融因想玉郎何處去對淑景誰同小樓中春
思無窮倚闌凝望閣牽愁緒柳花飛趁東風斜日照珠
簾羅幌香冷粉屏空海棠零落鶯語殘紅

陽關引

一名古陽關與陽關曲

同義雙調七十八字

陽關引

寇準

塞草煙光濶渭水波聲咽春朝雨霽輕塵斂征鞍發指

青青楊柳又是輕攀折動黯然知有後會甚時節更
盡一杯酒歌一闌歎人生裏難歡聚易離別且莫辭沉
醉聽取陽關徹念故人千里自此共明月

前調

寄八弟

晁補之

草草蛩吟噎暗柳螢飛滅空庭雨過西風緊飄黃葉卷
書帷寂靜對此傷離別重感歎中秋數日又圓月沙
蒲檣竿上淮水閣有飛鳬客詞珠玉氣冰雪且莫教皓
月照影驚華髮問幾時清尊夜景共佳節

金人捧露盤

金一作銅一名上西平一名西平
曲一名上南平雙調七十八字

金人捧露盤

會稽秋風
亭觀雪

辛棄疾

九衢中杯逐馬帶隨車問誰解愛惜瓊華何如竹外靜
聽窸窣行沙自憐是海山頭種玉人家 紛如鬪嬌
如舞纔整整又斜斜要圖畫還我漁蓑凍吟應笑羔兒
無分謾煎茶起來極目向瀾茫數盡歸鴉

前調

送杜叔高

辛棄疾

恨如新新恨了又重新看天上多少浮雲江南好景落
花時節又逢君夜來風雨春歸似欲留人尊如海人
如玉詩如錦筆如神更能幾字盡殷勤江天日暮何時
重與細論文綠楊陰裏聽陽關門掩黃昏

甘州令

亦是六州歌頭之
一雙調七十八字

甘州令

柳永

凍雲深淑氣淺寒欺綠野輕雪伴早梅飄謝豔陽天正

明媚却成瀟洒玉人歌畫樓酒對此早驟增高價賣
花巷陌放燈臺榭好時代怎生輕捨賴和風蕩霽霽廊
清良夜玉塵鋪桂莖滿素光裏更堪遊冶

紅牕燈影

雙調七十八字王錫爵
一詞和友人自度曲也

紅牕燈影

王錫爵

高倚危樓垂垂四面皆空翠離天近矣除了凡心未歎
濁質少清緣奇異一段斜陽團簇箇間愁送至試問

斯愁端倪還向何邊起黃村綠野總是傷人意笑遺恨
特登樓一味相對長吁看又是寒雲擁蔽

御街行

又一體雙調七十
八字一名孤鴈兒

御街行

范仲淹

紛紛墜葉飄香砌夜寂靜寒聲碎真珠簾捲玉樓空天
澹銀河垂地年年今夜月華如練長是人千里愁腸
已斷無由醉酒未到先成淚殘燈明滅枕頭敲諳盡孤

眠滋味都來此事眉間心上無計相迴避

前調

楊无咎

平生厭見花時節
惟只愛梅花發
破寒迎臘吐幽姿
占斷一番清絕
照溪印月帶煙和雨
傍竹仍藏雪
松煤染出宜孤潔
最嫌把鉛華拭
暗香銷盡欲飄零
須得笛聲鳴咽
這些風味自家領畧
莫與傍人說

前調

辛棄疾

闌干四面山無數
供望眼朝與暮
好風吹雨過山來吹

盡一簾煩暑紗幮如霧簾紋如水別有生涼處
冰肌不受鉛華污更旒旒真香聚臨風一曲最妖嬈唱得行
雲且住藕花都放木樨開後待與乘鸞去

前調

程垓

住家不覺窮冬好向客裏方知道故園梅子正開時記
得清尊頻倒高燒紅燭暖熏羅幌一任花枝惱如今
客裏傷懷抱忍雙鬢隨花老小牕獨自對黃昏只有月
華飛到假饒真箇鴈書頻寄何似歸來早


前調

宋媛

李清照

藤牀紙帳朝眠起說不盡無佳思沉香煙斷玉鑪寒伴
我情懷如水笛聲三弄梅心驚破多少春情意小風
疎雨瀟瀟地又催下千行淚吹簫人去玉樓空腸斷與
誰同倚一枝折得人間天上沒箇人堪寄

御選歷代詩餘卷四十九



總校官庶吉士臣張能照

校對官庶吉士臣陳崇本

膳錄監生臣閻學澄